

Double

Orville

LE BON
FRANÇOIS

A MESSIEVRS DV
Parlement de Paris.

M. DC. XXI.

Case

F

39.

.326

LE BON

16216

THE NEWBERRY
LIBRARY

MESSIEURS
Parlement de Paris.

N. D. C. XXI.

LE BON FRANÇOIS

*A Messieurs du Parlement de
Paris.*

CHocquerez-vous toujours l'auctorité du Roy, vous qui ne tenez vostre auctorité que de luy, ferez-vous toujours opiniastres à contrecarrer ses volonteés, vous qui n'en estes que les exécuteurs? faut-il que vos arrests s'opposent à ses Edicts, vos Conseils à ses intentions, & vos paroles à ses commandemens? Ces voix dont il ostorise l'organe pour absoudre quelquesfois les contables, oseront elles bien condamner les iustes ordonnances de leur Souuerain? Que ses Edicts qui sont autant d'Oracles soient mis à la censure de ses subiects, quel l'inférieur contrôle les actions & les volonteés de son Maistre; que ce qui part du cabinet soit espluché dans la basse court, c'est venir tout à fait de la Monarchie à ce miserable Estat populaire de la premiere Roynie, pleine d'esmeute & de seditions, où les tribus ballotoient les arrests du Senat.

Ignorez-vous Messieurs, que les Roys tiennent de la Diuinité: que les secrets mouuemens de leurs cœurs soient guidez & reglez par vne intelligence plus haute; & plus sublime que ceux des autres hommes; & qu'il y a quelque chose d'auguste & de mystérieux en tout ce qu'ils font ou qu'ils disent, dont les ressorts sont cachés au vulgaire, ils viennent souvent à répren-

4

dre ce qu'ils ne peuuent cōprendre. Ce seroit estre priué de sens cōmun de debouter que cet vniuers ne soit conduit par les ordres de la prouidence Diuine, qui fait reluire de tous costez les rayons de sa prouidence, en la pollice de toutes les parties du Monde.

Plusieurs neantmoins mesurans les euenemens d'icy bas aux maximes de leur iugemens, y trouuent à redire. Ils entreprendroient volontiers la conduite du temps & des saisons pour les regler à leur mode, ne trouuant pas qu'elles aillent bien, & comme il faudroit. Il pleut quand il ne faut pas suiuant leur aduis, il ne pleut pas quand il en est besoin: tout va ce leur semble à contretéps, mais au bout du compte, l'année est plantureuse, & les fruiçts de la terre respondent au souhait & à l'esperance du laboureur, par la sage conduite de celuy qui faict tout pour le mieux, par des moyens incogneus, & bien souuent impreueus par les hommes. Lors qu'un pauvre blessé perd son sang par vne ou plusieurs playes qu'on ne peut estancher, le sage Medecin ne laissé pas de luy ouurir la veine, & de luy entirer d'auantage par vn costé, pour l'arrester de l'autre. Le vulgaire ignorant des effects de la reuultion, condamne entierement ce remede. On nous renuerse l'estomach, & vne medecine qui trouble l'harmonie du corps, & met sans dessus dessous, toutes les humeurs, nous faisant pour vn temps plus malades que nous ne sommes, mais c'est pour nous faire couler insensiblement dans le calme de la sènté.

Ainsi Messieurs, ces derniers declaratiōs & ces Edicts nouveaux, quoy que moulsiez premiere-

ment dans le Conseil priué, issus du cerueau d'un grand Roy, & qui ont passé par l'estamine de tant de rares personnalités consummez aux affaires d'Estat, vous semblent neantmoins preindiciables au bien public, ne considerans point qu'ils ne visent qu'à l'establissemēt d'euluy. Vous criez qu'on veut separer vos charges, & ruiner vos Estats, & vous ne voyez pas que l'on les affermit d'auantage.

Mais non, ie ne vous croy pas si peu clair voyans, n'y si iniustes en vos sentimens que vous ne cognoissiez les iustes raisons qu'à le Roy en l'Estat ou se treuvent maintenant ses affaires, & après des despences extraordinaires, que la necessité luy a faict faire, d'auoir recours à quelque ayde extraordinaire, qui est le secours anticipé du droit criminel que vous auiez accoustumé de payer tous les ans pour l'assurance de vos Estats. Et m'assure que si l'on ne se fust adressé qu'à l'Artisan ou au Laboureur, sans toucher à vos bourses, vous neussiez pas faict tant de difficulté d'y prestre vos consentemens. Mais par ce que là chose vous touche, vous opposez vos particuliers intereests aux intereests du Roy, & ne voudriez vous incommoder tant soit peu pour l'accommoder, y allant mesme de vos commoditez, & de celle de tout le peuple, sans considerer que le bras qui n'a point de mal, s'offre bien à receuoir le coup de l'ancette, pour sauuer tous les autres membres, du salut desquels depend encore le sien.

Vous vous targuez, Messieurs, du credit que vostre corps à tousiours eu, mesme du temps que Hugues Capet, qui ne faisoit rien que par l'aduis de son Parlement. Mais vous ne cōsiderez qu'alors

6
les grands du Royatme ne recognoissoient ce nou-
uel establisement de Royauté, comme nous le
cognoissons à cest heure qu'il a passé par vne suc-
cession legitime de vingt-neuf Roys, & de plus
de six Siecles entiers, & qu'il auctorisoit ces com-
pagnies, pour s'en seruir cōtre ceux qui detenoient
les pieces principales de l'Estat, ces Parlemens es-
tans composez des plus grāds du Royaume, soit
de naissance, soit de rang: aussi y assistoit il bien
souuent, comme le Roy va en son Conseil d'E-
stat, qui represente ce qu'estoient lors ces Parle-
mens, du corps desquels nous voyons qu'estoient
le Connestable, & le garde des Sceaux, & les Pre-
lats. Et sous Louys, se treuve que le Chancelier
en estoit President, il ne faut donc s'estonner si
c'este compagnie estoit en telle estime: & si les
Empereurs & les Papes ont remis quelquesfois
leurs differens à leur decison, comme fit Federic
II. ce qu'il auoit à demesler avec Innocent III.

Je scay bien que depuis que le Parlemēt fut fait
stable, il fut trouué bon que les volonteiz de nos
Roys, qui alloient à quelque police, & reiglemēt,
n'obtinssent lieu d'Edit: qu'elles n'eussent esté ve-
rifiées & enuoluguées en ce lieu, defferēs nos Rois
grandement aux deliberatiōs de sa Cour. Mais ce
n'est pas à dire qu'ils s'obligent entieremēt à cela,
& qu'ils ne se puissent dispenser de ces formes quād
bon leur semblera: Le Parlemēt s'est opposé d'au-
trefois à quelques Edicts qu'il n'aprouoit point,
iusques à la, que de venir en corps trouuer le Roy
chez luy, & luy dire qu'ils aymoyent mieux quit-
ter leurs charges que d'y apporter leur consente-
ment: mais c'estoit en des choses visiblement pre-

indiciable au Roy & à s^{on} Estat, & où les Officiers pensoient interesser leur conscience, encore procedoient ils plustost modestement que non pas de donner vn atrest entieremēt contraire à sa volōté.

Je sçay bien encore, que lors qu'ō veut faire d'une passion vne Loy, & que le Prince mal informé d'un fait, s'est laissé preuenir & surprendre en des choses, qui sous quelque apparence de bien, tirent apres elles beaucoup de maux. Nos Roys sont bien aises & ne trouuent mauuais que le Parlement en face qu'elque opposition, comme fit le grand Roy François sur vn Edit que certains Italiens auoient extorqué de luy par importunité : & encore qu'il leur eust cōmandé de le verifier par plusieurs fois, & reiterees iussions, iusques à les menacer s'ils ne le faisoient, il leur sceut neantmoins bon gré, & les loua par apres, d'y auoir apporté ceste difficulté : mais l'on scauoir bien que le Roy ne faisoit ses iussions que par mine, n'ayant nullement la volōté de le faire passer : car s'il l'eust cōmandé tout à bon, il n'y a point de doute qu'il luy eust salu obeir. C'est la grādeur d'un Roy de ne rien refuser, & de dōner de parole tout ce qu'on luy demande : mais c'est à celuy qui tient la bourse de mesnager l'argent, & y accommoder la liberalité de son maistre, toutesfois quand il cōmande absolument & specifie la somme qu'il veut estre dōnée, il faut trouver de quoy n'en fust il point dās l'espargne. Ainsi bien souuent les volōtez du Roy quoy qu'exprimees en forme d'expres commandement, sont conditionnees avec ceste interpretation, que sa Majesté entend qu'elles sortent leur plein & entier effect, pourueu qu'elles ne soient contre droit & raison.

& n'apporment aucun preiudice au bien de l'Estat.

Mais quand apres vne meure deliberation de son Conseil il fera quelque Edit, ou declare sa Volonté pour la faire mettre en execution par les Officiers de sa iustice le cōmandant absolument & en maistre, tant s'en faut qu'il s'y faille oppoler, qu'il y va de la conscience à ne l'approuer pas.

Pensez vous que ce fust sans exemple quand le Roy feroit enteriner ses Edicts, sans vostre approbation? fueilletez vos registres, & vous trouuerez l'Edit reuocatoire des ordōnances contre les abus de la Cour de Rome, dōt le Chācelier & le Comte de S. Paul, lors Gouverneur de Paris l'an 1418. firent par le commandement du Roy. publier les lettres sans ouyr le Procureur General, commandant le Chancelier qu'on y mist ces mots: *Lenès & publiques*, que le Greffier ne voulut iamais rayer, encore que la Cour luy commandast avec menaces, disant qui se garderoit bien de mesprendre.

Qu'on lise la vie de Louys xi. & l'on y trouuera qu'il n'usa guere de l'auctorité de la Cour, sinon entant que directement elle s'accordoit à ses volontez. Car estant encore Dauphin, & voulant faire publier vne certaine donation que le Parlement ne vouloit admettre, se leua vn Euesque qui remonstra que Monsieur le Dauphin l'auoit enuoyé là pour la faire publier. La Cour n'osa s'opposer à la volonté du fils de son Roy: seulement fit elle enregistrer sur le reply des lettres: De l'expres commandement du Roy, que le Dauphin leur fit rayer, avec menaces s'ils n'obeyssient. Depuis, le mesme Louys estant Roy, fit publier l'an 1465. vne donation contre le gré de la Cour, qui pensoit estre

9

estre assez deschargee, en protestant que c'estoit par le tres-expres commandement du Roy, sans qu'elle en soit iamais venuee la que de prononcer quelque arrest contraire aux Edicts ou declarations du Roy, comme vous fistes dernièrement, sans considerer le pouuoir que le Roy a de vous punir par l'interdiction de vos charges, ce qui ne seroit sans exemple: Car Charles VI. par lettres patentes du 15. May 1436. interdit le Parlement & la Chambre des Comptes, pour bien moindre sujet. Ou par le retranchement de vostre iurisdiction, en faisant de nouveaux Parlemens, comme Louys XII. qui en institua quatre tout à la fois, vous renfermant dans les bornes que vous avez maintenant, vous qui vous estendiez iusques aux extremités du Royaume: Ou bien creant en chaque Presidial des Conseillers qui iugent en dernier ressort, comme fit Henry II. Ou faisant le Parlement semestré à la façon du grand Conseil, comme fit le mesme Roy l'an 1554. Ou par la creüe de nouveaux Conseillers & Presidens, comme elle fut sous François I. qui en crea vingt d'extraordinaire tout à la fois: Ou finalement par l'election d'une nouvelle Chambre, comme fut en l'an 1580. la seconde Chambre des Requestes par le Roy Henry III. avec la creation de vingt nouveaux Conseillers, qui furent espars par les Chambres des Enquestes, sans qu'il y eu aucune necessité de ce faire.

Mais ce qui vous rend si hardis, est la stabilité de vos offices, qui ont esté continuez depuis Charles VII. Car auparauant, & mesme encor du temps de Philippe le Bel, qui arresta le Parlement à Pa-

ris, ne voulant plus qu'il fut ambulatoire, vos charges n'estoient que les simples commissions limitées à certain temps, & auoit accoustumé le Roy de faire vne liste de ceux qu'il vouloit auoir seance au Parlement, & en excluioit ceux que bon luy sembloit. Si ce reglement estoit restably au corps de la Iustice, & que la venalité des offices, introduite par Louys XI. & depuis toleree par ses successeurs en fust entierement abolie; ie m'assure que vous vous monstrieriez plus souples aux commandemens du Roy que vous ne faites.

Encore donc que nos Roys ayent tant deferé de tout temps aux Officiers de ceste Cour Souueraine, que de les admettre pour approbateurs & verificateurs de leurs Edicts, ce n'est pourtant qu'une forme, comme i'ay des-jà dit. Car quand le Prince parle absolument, & donne à entendre qu'elle est sa voloté par quelque declaration, comme fut la derniere touchant le droit annuel, il ne vous est pas permis d'en empescher l'executiō cōme vous auez voulu faire; autrement vous feriez problematique vne proposition que l'on n'a iamais reuocqué en doute, à sçauoir si le Roy est par dessus le Parlement, cōme on met en dispute, si le Pape est par dessus le Concile. Et certes c'est vne chose estrange que le mesme Parlemēt ayant souuent prononcé nos Roys francs de la censure de Rome, les veuille neantmoins assujettir à la sienne.

Vous auez d'autres fois entrepris de reprimer l'autorité licentieuse que se donnoit l'Vniuersité de Paris abusant des honneurs & prerogatiues dont nos Roys l'auoyent obligée, ayans bien eul' hardiesse l'an 1417. d'arrester prisonnier le Recteur; & faire mener plusieurs des Professeurs en

la Conciergerie du Palais; & vous pensez que le Roy n'aura pas le pouuoir de chastier le mespris que vous faictes de son autorité. Ne vous souuez-vous pas du Roy Charles IX. & cōme ils en fit croire, n'ayant encore attainit l'agē de 14. ans, pour la verification d'un Edict qui estoit de bien plus grande importance que ceste dernière declaration, lequel il fit passer de plēne autorité, sans qu'il fust mesme à Paris, adioustant à son proceder des rigueurs & contraintes (dont le Roy d'apresent, pour l'excez de sa bonté naturelle, ne s'est encor seruy) & deffendant très estroictement à son Parlement de prendre aucune cognoissance des affaires d'Etat.

Cen'est donc par obligation, Messieurs, que le Roy vous fait verifier ses Edicts, ny pour leur donner plus d'autorité; car sa volonté seule, & l'oracle de sa voix, suffisent pour les autoriser assez: mais il defere cest honneur à sa Cour Souueraine: à fin qu'elle prenne le soin de les faire émolguer & obseruer par tout son Royaume. Et ne doutez pas que le Roy ne puisse donner extraordinairement ceste commission à quelque autre Cour, ayant iurisdiction, ou subalterne, ou dependante, quand bon luy semblera, comme il a fait d'autres fois, en fait mesme de pardon & octroy de grace; & en d'autres affaires d'Etat à Messieurs de la Chambre des Comptes, ainsi que l'on peut voir par les lettres de Philippes de Valois du 9. Mars 1339.

Pensez-vous que les autres Corps n'ayent pas eu d'autres fois, & ne retiennent encōre pour le iour d'huy beaucoup de pouuoir & d'autorité, de la

quelle neantmoins ils n'abusent pas, & sçauent iniques à quel point il la faut estêdre. En quelle estimation estoit iadis l'Vniuersité de Paris, que nos Roys honoroient du nom de Fille aînée, & à laquelle ils deferoient tant que de luy communiquer toutes les plus importantes affaires, pour en auoir ou l'aduis, ou l'approbation, non seulement en ce qui regardoit la conscience & la Religion, mais encores aux choses politiques. Est-ce à dire pourtant qu'il y eust du deuoir ou de l'obligation du costé du Roy, & qu'il en deust passer par où il eust pleu à Messieurs de Sorbonne, soit pour la guerre soit pour les finances, & autres semblables affaires qui ne sont pas de leur gibier: C'eust esté veritablement tenir le Roy en tutelle, & former vne Aristocratie au milieu d'un Estat Souuerain à la façon des Ephores de Sparte, qui condamnoient leur Roy, non seulement à l'amende, mais encore au bannissement.

Il estoit permis à l'Vniuersité de faire de tres-humbles remonstrances au Roy sur les incidens qui se presentoient, comme elle faisoit bien souuent avec toute sorte de respect, & comme il vous est encore permis à vous autres Messieurs du Parlement: mais d'y resister avec tant d'animosité, comme vous auez desia fait par deux fois, de tenir ses Edicts en souffrance, & s'opposer à ses declarations; c'est passer ce me semble toutes bornes de bien seance. Censurer les commandemens de son Roy, est vne hardiesse bien grande; ny obeir point est vn crime: mais d'empescher, voire mesme de fendre aux autres, sous des peines expressees d'y obeir, c'est où ie ne croyois pas que peust arriuer

Le mespris des suiets enuers leur Souuerain.

Il laisse à part les attaques & inuectiues trop libres, ce me sêble, de quelques vns de vostre corps, contre les plus fideles seruiteurs du Roy, & ceste particularité de vostre arrest de faire informer, & vouloir prendre cognoissance de cause de la maluerfation des Finances, & du pretendu desordre de l'Estat: qui est s'en prendre directement aux Officiers à qui le Roy en a donné le maniment, & taxer indirectement le Roy mesme de peu de iugement, & ne sçauoir faire le choix des gens dont il se veut seruir. Mais la prudence qui reluit en toutes ces actions Royales, & la vie exemplaire & irreprehensible de ceux qui ont la conduite des plus importantes affaires de son Estat, & celle de ses Finances, seruent d'Apologie à ces reproches fondez plustost sur l'enuie que sur la verité.

Mais pour monstrier, Messieurs, que ce n'est pas tant le zele du bien public, comme vostre particulier interest, qui vous a portez à ceste des-obeissance: c'est que lors qu'il a esté question d'aliener le domaine du Roy, de faire de nouvelles impositions sur le peuple, de proscrire les plus grands du Royaume, & d'approuuer mille semblables choses, que l'ordre ou le desordre & le malheur du temps apportoit, vous ne vous estes pas môstrez si difficiles, ou si vous l'avez fait, côme audernier Edit des Offices de Procureurs: vous l'avez finalement passé, sans venir à vn arrest contradictoire, comme vous avez fait à ce coup.

Mais venons au fonds ie vous prie, & considerons si vous estes tant greuez comme vous criez. On éualuë vos offices plus qu'ils n'estoient, & sur

ce pied on vous demande vne certaine somme anticipée qui reuiet à quatre années d'auance pour le droict annuel que vous auez demandé avec tant d'importunité, pour sauuer vos offices: Vous voyla bien gastez, puis qu'on vous les rembourse sur le quart denier de la resignation. Et quand cela ne seroit, prenez le cas que cét argent est au lieu de celuy que vous receuez des plaidans, dont vous vous priuez pour trois ou quatre ans; ce qui ne vous doit estre rude, puisqué vos majeurs se cōten toient anciennement de leurs gages, & ne prenoient des parties que quelques confitures qu'on appelloit espices.

Ou bien encore que c'est vn prest que vous faites au Roy, & qu'il vous demande par emprunt, comme faisoient anciennement ses predecesseurs, vous asseurant vostre argent sur le fond mesme dont il le prend: Ce que vous ne luy deuez refuser si vous estes bons subjects, attendu que ces deniers ne se doiuent employer inutilement pour en faire des dons & des profusions, comme plusieurs pensent mal à propos. Il y auroit quelque sujet de le croire, si le Roy n'eust fait aucune despense extraordinaire, mais ayant espuisé toutes ses Finances, & anticipé mesme sur l'année qui vient, pour subuenir aux frais de la guerre; dequoy voulez vous qu'il remplace ce qu'il a soustrait à la despence mesme de sa Maison? dequoy voulez vous qu'il rembourse les Thresoriers del'Espagne, qui ont auancé des millions, tant du leur, que de ce qu'ils ont emprunté, & qui sont en arriere de plusieurs quartiers? dequoy voulez-vous en fin que sa Majesté recompense ses bons & fideles seruiteurs

qui l'ont assisté en ces derniers mouuemens? De surcharger le pauvre païsant, qui a esté rongé iusques aux os, il n'y a point d'apparence? d'affoiblir la monnoye, comme on fit souz Philippes le Bel, on auroit plus de sujet de se plaindre? d'introduire des maletotes sur toutes sortes de denree, come souz Philippes le Long, il y auroit bien plus de crierie? d'establis la pancarte par tout le Royaume, come sous Henry II. cela pourroit causer quelque mutinerie? de faire vne taille extraordinaire par teste, en forme de la capitation Romaine, comme on fit souz Francois I. seroit vn peu de dure digestion. Pour ne venir donc point à ceste rigueur d'exactions, on trouue le moyen le plus doux qu'on eust sceu excogiter pour subuenir aux necessitez presentes du Roy, par lequel ceux qui sont incommodiez d'vn costé s'accommodent de l'autre, qui est le droit annuel, desiré grandement, & requis de ceux qui ont des offices pour les assseurer, avec telles conditiōs que ce qui se perd d'vne part, se remplace de l'autre; & la playe n'est si tost faite, que le cataplasme ny soit appliqué, à la façon de la lance d'Achille, qui guerissoit la blesseure qu'elle auoit faite. O les mauvais mesnagers que vous estes! vous vous pensez espargner vn escu, & courez fortune d'en perdre quatre; ie ne dis pas pour la risque que vous faites courir à vos offices, mais pour le danger d'vne guerre que vous nous pourriez mettre sur les bras en ny pensant pas, & ce par vostre mesnagere circonspection: car ne scauez-vous pas que l'argent est aussi bien instrumēt de la paix comme de la guerre: & que si l'on voyoit le Roy foible de ce costé, cela pourroit donner sujet à

plusieurs mauvais esprits de se seruir du tempts; là où s'il en est bien pourueu, ils y penseront plus de quatre fois auant que l'entreprendre. Or qui ne voit que trois mois de guerre vous apportét beaucoup plus de dommage que ne font trois annees de droict annuel.

Ne vous plaignez donc pas hors de propos, & n'allez plus disant qu'on vous rend taillables: car le Roy ne vous force point à donner ce droict, le laissant purement à la liberté d'un chacun, sans y adiouster des conditions plus rigoureuses qu' auparauant, sinon de ceste auance qui vous sera tousiours remboursee. Vous voyez comme vn chacun s'esuertue à secourir les necessitez presentes du Roy. Le Clergé par le surcroist des decimes; la Noblesse par l'espee & le renoncemēt de ses pensions, ou pour le moins de la moitié d'icelles; les Fināciars, par l'aduāce de six annees; le tiers Estat, par les charges & impositions, tant ordinaires qu'extraordinaires. Pourquoy serez vous seuls exempts de contribuer au bien public, comme s'il ne vous touchoit pas aussi bien qu'aux autres.

Lors qu'il fut question d'aller faire des nouuelles conquestes hors du Royaume, comme en Leuant souz le Roy Louys IX. ou en Angleterre souz Charles V I. on ne pensoit pas auoir satisfait, ou au deuoir, ou à la conscience de contribuer les reuenus seulement: mais la pluspart vendoient le fonds & les heritages, pour vn si bon suiet. Et vous, Messieurs, pour conseruer vos propres maisons & vos heritages, par le moyē d'une paix de duree que le Roy veut establir en France, ferez difficulté d'employer vne si petite partie de vostre reuenue.

Puis

Puis donc, Messieurs, que la declaration du Roy touchant le restablissement du droict annuel, n'est qu'un reglement de Finances adressé au Seau, & signifié aux Tresoriers généraux de France, pour le faire publier par toutes les Elections, chose qui n'est nullement de vostre ressort : puis que le secours que le Roy en attend est fondé sur de bons & legitimes suiets; puis que l'on desdommage l'intérêt qu'il y semble auoir : puis que la suruiuance de vos offices vous est octroyee, & que pour peu vous assurez beaucoup : puis que finalement c'est vne chose volontaire, & qui n'oblige personne : Reuôquez vostre arrest : ne defendez point ce que vous ne pouuez empêcher : n'empêchez point les autres de iouyr du prinilege que vous refusez, ne chocquez point la volonté du Roy; ne censurez point ses Edicts, n'arrestez point le cœur de ses intentions, n'attirez point son courroux dessus vous, & sur tout, prenez garde de n'encourir de rechef le blasme qu'on vous donnoit il y a six ans, d'auoir esté cause de tous les troubles qui aduinrent l'an 1614. par les remonstrances que vous veniez faire souuent au Louure, & par les plaintes ordinaires que vous semiez par tout du pretendu desordre, & desreiglement del'Estat, qui donnerent subject aux Princes qui s'estoient mis à l'escart de faire publier vn Manifeste, & en suite leuer la banniere pour en rechercher, à ce qu'ils disoient, la reformation, au lieu donc qu'il estoit aisé d'assoupir le feu d'une guerre ciuille dedans ses propres cendres, par des bons accommodemens, & de contenter vn chacun, vous le fistes allumer d'auantage, & gagner si auant, qu'on fut à la

veille de voir le total embrasement de la France. Vous me direz que c'estoit vn bon zele : mais il falloit voir s'il estoit comme dit S. Paul , suiuant la science , c'est à dire suiuant la raison d'Estat, qui est bien differente de la raison du droit escrit.

Considerez encore , Messieurs, que les autres Cours Souueraines n'approuuent nullement ces passe-droits & licences que vous prenez contre la puissance Royale, & se separent entierement de vous, qui deueriez leur seruir de miroir & d'exemple, non seulement en ce qui regard la science de bien iuger, mais encore bien obeyr à son Roy.

Retractez vous donc de vous mesmes & n'attendez point l'enregistrement d'un Edit qui casse vostre Arrest avec la difference, possible, de ne vous mesler plus des affaires d'Estat, de vous assembler pour ce fait, sans permissions du Roy : car vostre institution n'est que pour vacquer à la Iustice, & rendre à chacun ce qui luy appartient sous l'auctorité du Roy, qui vous establit Iuges des differens qui suruiennent entre le demandeur & le deffendeur, tant pour le Ciuil, que pour le Criminel, & le soulager en cela, tandis qu'il s'occupe avec son Conseil aux plus graues & importantes affaires de son Estat, desquelles il ne vous est permis de prendre cognoissance, sinon quand il vous fait l'honneur de vous y appeller, ou de vous en faire executer les resolutions, par la verification de quelque Edit ou declaration. Bien est il prest tousiours d'ouyr les humbles remonstrances que vous luy pouuez faire sur les subjects qui se presenteront, mais s'il veut passer outre, il faut acquiescer à ses

volontez, & captiuer, comme on faict en maniere de foy, son iugement à l'obeissance de son Supérieur, & c'est le vray moyen de conseruer vostre auctorité, de laquelle vous estes tant ialoux : car toutes, & quantes fois que vous voudrés faire bresche à celle du Roy, seulement de parole, il diminuera la vostre de parole & d'effaict. Mais si vous conspirez vnanimement à maintenir sa Royale grandeur, & secondez par le pouuoir, qu'il vous donne ses bonnes intentions, il sera vostre protecteur, il auctorisera vos iugemens, il vous conseruera vos droicts, & vous fera respecter par tous les grands du Royaume.

Au reste ne prenez en mauuaise part ce petit discours faict sans aucune sorte d'interest ou de passion, par vne personne qui n'a point vne plume venalle, & qui n'est gagé pour cela, n'ayant iamais eu pension ny appointment, ou autre particulier bien faict du Roy ny pretention d'en auoir, ou d'en meriter, mais qui est (comme bon sub, ect) zelateur de l'auctorité sacrée de son Roy, ne pouuât souffrir qu'on y touche sans en faire esclater le resentiment, & qui d'autre coste sera tousiours prest de tourner la pointe de sa langue pour deffendre l'auctorité de vostre Auguste & Venerable compagnie, quand on luy voudroit iniustement oster le lustre & la gloire qui luy appartient, & que le Roy mesme luy cōseruera tousiours tandis qu'elle se maintiendra dans les termes du respect, & de l'obeissance.

FIN.

